



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

განის რეფორმები

განის რეფორმები, პირობითი სახელწოდება იმ ადმინისტრაციულ-პოლიტიკური და ეკონომიკური ღონისძიებებისა, რ-ებიც რუსეთის მთავრობამ გაატარა ამიერკავკასიაში XIX ს. 40-იანი წწ. დასაწყისში. 1840 წ. 10 აპრ. რუს. იმპერატორმა ნიკოლოზ I-მა დაამტკიცა სენატორ პ. განის ხელმძღვანელობით შემუშავებული კანონები: „უზენაესად დამტკიცებული დანესებულება ამიერკავკასიის მხარის მმართველობისათვის“, „დებულება საქალაქო საზოგადოებრივი მმართველობის შესახებ თბილისში“, „დებულება საერო საბეგრო კომიტეტების შესახებ ამიერკავკასიაში“, რ-ებიც ძალაში შევიდა 1841 წ. 1 იანვრიდან.

გ. რ. მიზნად ისახავდა თვითმპყრობელობის პოლიტ. და ეკონ. პოზიციების განმტკიცებას, ადმინ. და სასამართლო დანესებულებებისაგან მკვიდრი მოსახლეობის წარმომადგენელთა ჩამოშორებას, ადგილ. იურიდიული საკანონმდებლო აქტების გაუქმებას, რუსიფიკატორული პოლიტიკის გაძლიერებას. ამიერკავკ. ახ. ადმინ.-პოლიტ. დაყოფა უგულბელყოფდა ამიერკავკ. ხალხების ისტ.-ეკონ. და კულტ.-ეთნიკურ თავისებურებებს. გ. რ-ის შესაბამისად ამიერკავკასია დაიყო 2 ადმინ.-პოლიტ. ერთეულად: საქართველო-იმერეთის გუბერნიად და კასპიის ოლქად. საგუბერნიო, საოლქო და სამაზრო მმართველობა მოეწყო რუსეთის იმპერიის შიდა გუბერნიების მსგავსად. მხარის მართვის სადავეები მთავარმართველის ხელში იყო მოქცეული. 1842 წ. 10 აპრ. დებულებების ცხოვრებაში გატარებამ გამოიწვია ადგილ. მოსახლეობის დიდი უკმაყოფილება, რ-საც მძიმე ტვირთად დააწვა გაზრდილი სამოხელეო აპარატის შესანახი ხარჯები (საერთო თანხამ იმატა 1567000 მან.). საქართველოს მთელ რიგ რ-ნებში ადგილი ჰქონდა შეიარაღებულ გამოსვლებს (გურიის აჯანყება 1841 და სხვ.). გ. რ-მა აგრეთვე შეავიწროვა ცარიზმის სოციალური ბაზა ამიერკავკასიაში, რადგან ახ. საკანონმდებლო აქტების ძალით შეიზღუდა გაბატონებული წოდების პოლიტ. და ეკონ. უფლებები. ამიერკავკასიაში შექმნილი რთული ვითარების გამოსარკვევად იმპ. ნიკოლოზ

I-მა მიავლინა (1842) სამხ. მინისტრი ა. ჩერნიშოვი და სახელმწ. მდივანი მ. პოზენი, რეზოლუციის უარყოფითი შედეგის შესახებ მისცეს პ. განის საკანონმდებლო საქმიანობას. მთავრობა იძულებული გახდა ანგარიში გაეწია პოლიტ. ვითარებისათვის და წასულიყო მთელ რიგ დათმობაზე. XIX ს. 40-იანი წწ. შუახანისათვის თვითმპყრობელობა ცვლის თავის პოლიტიკას ამიერკავკასიის პრივილეგირებული წოდებების მიმართ. ამიერიდან იგი ცდილობს განამტკიცოს მათთან მჭიდრო კავშირი. ცარიზმის ეს მისწრაფება მკაფიოდ გამოვლინდა მეფისნაცვლის ვორონცოვი მიხეილქმ. ვორონცოვის მოღვაწეობის ხანაში.

ლიტ.: საქართველოს ისტორიის ნარკვევები, ტ. 5, თბ., 1970, გვ. 127-132; ჩ ხ ე ტ ი ა შ., რუსული მმართველობის სისტემა საქართველოში (1840-1864), «საქართველოს სახელმწ. მუზეუმის მოამბე», 1944, ტ. 12; И в а н е н к о В. Н., Гражданское управление Закавказьем от присоединения Грузии до наместничества вел. кн. Михаила Николаевича. Исторический очерк, Тфл., 1901; Из записок барона (впоследствии графа) М. А. К о р ф а , «Русская старина», 1900, т. 101; Э с а д з е С., Историческая записка об управлении Кавказом, т. 1-2, Тфл., 1907.

ო. ჟორდანიია
